

Na osnovu člana 10. i 12. Zakona o udruženjima i fondacijama Bosne i Hercegovine ("Službeni glasnik BiH", br. 32/01, 42/03, 63/08 i 76/11) Osnivačka skupština Udruženja dobitnika Zlatne značke Univerziteta u Sarajevu na sjednici koja je održana dana 13.12.2012. godine u Sarajevu usvojila je

STATUT

Udruženja dobitnika Zlatne značke Univerziteta u Sarajevu

I – OPĆE ODREDBE

Član 1.

Udruženje dobitnika Zlatne značke Univerziteta u Sarajevu (u daljem tekstu: Udruženje) je osnovano Odlukom o osnivanju Udruženja koju je donijela Osnivačka Skupština održana dana 13.12.2012. godine u skladu sa Zakonom o Udruženjima i fondacijama Bosne i Hercegovine (u daljem tekstu: Zakon).

Član 2.

Ovim Statutom, u skladu sa članom 12. Zakona, uređuje se:

- a) naziv, skraćeni naziv i sjedište Udruženja;
- b) ciljevi i djelatnosti Udruženja;
- c) postupak za primanje i isključivanje članica/ova;
- d) tijela Udruženja, način na koji se biraju, ovlaštenja koja imaju, kvorum i pravila glasanja, trajanje mandata, osoba ovlaštena da sazove Skupštinu, uslovi i način raspuštanja, odnosno prestanka rada Udruženja;
- e) pravila za ostvarivanje, upotrebu i raspolaganje sredstvima Udruženja, tijelo koje je ovlašteno za nadzor nad upotrebom tih sredstava, način podnošenja finansijskog izvještaja i izvještaja o radu;
- f) javnost rada;
- g) postupak za izmjenu i dopunu Statuta, ovlaštenje i način donošenja drugih općih akata;
- h) opis, oblik i sadržaj pečata i znaka;
- i) zastupanje Udruženja;
- j) postupak donošenja finansijskog izvještaja i izvještaja o radu;
- k) uslovi i postupak za spajanje i podjelu, odnosno prestanak rada Udruženja uključujući i bilo kakav poseban kvorum ili pravila za postizanje kvalifikovane većine u postupku glasanja;
- l) postupak za raspolaganje preostalim imovinom ili drugim sredstvima u slučaju raspuštanja ili prestanka rada Udruženja.

Član 3.

Udruženje je nestranačko i nevladino Udruženje, dobrovoljno udruženih lica, dobitnica/ka počasnog priznanja Zlatna značka Univerziteta u Sarajevu, u svrhu zastupanja pojedinačnih i zajedničkih interesa, te radi ostvarenja ciljeva određenih ovim Statutom, bez namjere sticanja profita.

Udruženje ima svojstvo pravnog lica sa svim pravima, obavezama i odgovornostima u skladu sa Zakonom i ovim Statutom, koje stiče upisom u registar nadležnog organa. Udruženje u platnom prometu nastupa samostalno u svoje ime i u okviru svojih pravnih mogućnosti će obavljati pravne poslove.

Za obaveze u pravnom prometu Udruženje odgovara svojom cjelokupnom imovinom.

II – NAZIV, SKRAĆENI NAZIV I SJEDIŠTE UDRUŽENJA

Član 4.

Naziv udruženja je:

- Udruženje dobitnika Zlatne značke Univerziteta u Sarajevu
- Udruga dobitnika Zlatne značke Univerziteta u Sarajevu
- Удружење добитника Златне значке Универзитета у Сарајеву

Skraćeni naziv Udruženja glasi:

Udruženje ZZUNSA

Udruga ZZUNSA

Удружење ЗЗУНСА

Udruženje će koristiti i naziv na engleskom jeziku koji glasi: Association of Golden badge recipients of University of Sarajevo.

Skraćeni naziv Udruženja na engleskom jeziku: GBUNSA.

Član 5.

Sjedište Udruženja je u Sarajevu, ulica Zmaja od Bosne broj 8.

Član 6.

Udruženje može promijeniti svoj naziv, sjedište i znak.

Odluku donosi Skupština Udruženja natpolovičnom većinom članova Skupštine.

Član 7.

Udruženje djeluje na teritoriji cijele Bosne i Hercegovine.